

賢州名勝志

貴州名勝志

貴州省圖書館複製

貴州名勝志複製說明

貴州名勝志，四卷，明曹學佺撰。作者字能始，福建侯官人，萬曆二十三年進士，明史卷二百八十八有傳。

本志雖名為名勝志，但所涉及內容尚有各府、州、縣、衛之建置、沿革、疆里及土司等。

複製本係據貴州省博物館藏明刻本刻印。複製時除據正文擬具目錄裝入書首外，並校正了少數明顯的錯別字；凡經校改之字，均

與原字對照列入附錄校字表中，以便讀者參
攷。

在複製過程中，承貴州省博物館熱情支持，
謹此致謝。

貴州省圖書館

一九六五年三月

貴州名勝志目錄

卷之一

貴寧道所屬

貴陽軍民府

新貴縣附郭

貴定縣附郭

宣慰使司附郭

貴州衛附郭

貴州前衛附郭

定番州

金筑安撫司

宣慰司所屬

定番州所屬

威清衛

平壩衛

安順軍民府

所屬土司

普定衛

鎮寧州

州屬土司

安莊衛

永寧州

州屬土司

安南衛

普安州

卷之二

畢節道所屬

畢節衛

烏撒衛

赤水衛

永寧衛

普市所

龍里衛

屬司

新添衛

屬司

卷之三

新鎮道所屬

都勻府

都勻長官司

邦水長官司

平浪長官司

平洲六洞長官司

麻哈州

樂平長官司

平定長官司

獨山州

清平縣

合江洲陳家爛土長官司

豐寧長官司

平越軍民府

清平衛

興隆衛

黃平州

餘慶縣

甕安縣

湄潭縣

凱里安撫司

鎮遠府

鎮遠縣
附郭

施秉縣

府屬土司

黎平府

永從縣

府屬土司

卷之四

思石道所屬

思州府

思南府

安化縣 附郭

貴州
婺川縣

印江縣

屬司

石阡府

龍泉縣

府屬土司

銅仁府

銅仁縣
附郭

卷之四
總敘

貴州之名古未有也其治所則殷周之鬼方易曰
高宗伐鬼方詩蕩八章覃及鬼方是也漢稱羅甸
國唐稱羅羅鬼主宋元稱羅施鬼國今猶稱大鬼
王羅鬼也地在禹貢荆梁二州之南境宋朝紀要
以鬼方地林多貴竹原設有貴竹長官司因以名
州按土官安氏家譜有宋初勅諭云惟爾貴州遠
在要服則貴州之名已見于宋前矣迨元世祖至
元十六年西南八番羅氏等國來附洞寨凡一千
六百二十有六遂置八番羅甸等處軍民宣慰使

司于貴州今貴陽府所轄長官司有程番韋番方
番洪番龍番金石番羅番盧番者即元初之八番
也嗣後又分龍番為卧龍大龍小龍三番去舊志
獨今貴陽府及畢節平壩為羅施鬼國地今宣慰
司及安莊為羅甸國普定為羅鬼狍狍所居是鬼
方幅隕僅止于此宋之貴州亦止于此元建宣慰
司之後更鬼國為順元路以討平允溪十八峒為
郡縣并立總管府俱聽本路節制至元二十二年
以思播三州隸之二十八年置八番順元宣慰司
都元帥府迭隸于四川湖廣二行省我國初洪

武四年置貴州宣撫司隸四川六年陞為宣慰使
司十五年設貴州都指揮使司永樂十一年以思
南恩州土官田琛田宗鼎搜化伏誅遂置思州新
化黎平思南鎮遠石阡銅仁烏羅八府因設貴州
布政使司而改貴州宣慰司并隸之十二年烏撒
衛來隸十七年都勻衛來隸正統二年永寧州來
隸三年設安順州流官來隸改普定衛來隸萬曆
二十九年平播州分其地為平越軍民府來隸今
所領府八州八縣十二宣慰司一衛二十二所二

貴州名勝志卷之一

閩中曹學佺能始著

貴寧道所屬

貴陽軍民府

領一州二縣一安撫司十六長官司

五代時楚王馬殷遣八姓帥率筓管柳州兵討兩

江溪峒至安氏疆土留軍戍之遂各分據號八番

宋為羈縻南寧州治卧龍至道元年南寧酋長龍

漢瓊遣使率西南牂牁諸夷貢方物時龍氏最強

諸番皆為所統自號龍番元至元十九年詔降夷

八番金筑百餘寨三萬四千餘戶悉為郡縣置順

元路及貴州于今宣慰司治內以統之 明洪武
四年酋長密定等舉土內附置安撫司一長官司
十六隸貴州衛正統元年以木瓜麻嚮大華山長
官司割屬金筑安撫司及程番等十三長官司俱
直隸貴州布政司成化十年長官方勇等願開府
治設文官領之遂設程番府于程番長官司其安
撫司及十六長官司俱隸焉隆慶二年移府治于
省城益以貴竹平伐二司改名貴陽府萬曆二十
八年加軍民府○明楊慎滇程記云貴陽治城中
華夷雜居曰舊人曰獠獠曰宋家曰蔡家曰仲家

曰龍家曰曾竹龍家曰紅狔狔曰花狔狔曰東苗
曰西苗曰紫江苗曰汀芽狔狔曰賣爺苗按舊人
者男女服食皆同中原蓋先代或官或商流落于
此者云□羅羅本盧鹿而訛為今名也有二種居
水西十二營寧谷馬場漕溪者為黑羅羅亦曰烏
蠻居募役者為白羅羅亦曰白蠻風俗畧同而黑
者為大姓羅俗尚鬼故又曰羅鬼蜀漢時有羅甸
國王自羅甸東西若自杞夜郎牂牁則以國名若
特磨白衣九道則以道名皆羅羅之種也其俗愚
蠻為主所虐至赤族猶舉其子姓若妻妾戴之不

以為讐故自火濟至今千有餘年世長其土其人
深目長身黑面而白齒椎結跣躡荷氊戴笠而行
腰束葦索左肩拖羊皮一方佩長刀箭箠富者以
金釧約臂悍而喜鬪寬則以漁獵伐山為生急則
屠戮相尋故其兵常冠諸苗文字類蒙古與人食
飯一盤水一盃匕一枚抄飯哺許搏之若丸以匕
躍口食已必滌臙刷牙齒作酒盞而不縮以蘆管啐
飲男子薙髭而留髻婦人束髮纏以青帶以雞骨
占吉凶正妻曰耐德非耐德所生不得繼父位酋
長死則集千人被甲胄馳馬若戰以錦緞氊衣裹

屍焚于野招魂而葬之名曰火葬張蓋其上盜取鄰境酋長之首以祭不得則不能祭其期會交貨無書契用木刻重信約盟誓凡有反側剝牛撫諭分領片肉不敢復背白羅羅之俗畧同而飲食忌草盛無盃盤爨以三足釜灼毛齧血無論鼠雀蚘蛛蠕動之物攫而燔之攢食若彘不通文字結繩刻木以為信人死以牛馬革裹而焚之□宋家蔡家皆中國之裔相傳春秋時楚子蠶食宋蔡二國得其人放之南徼遂流為夷二氏風俗畧同而宋家稍雅馴通漢語或識文字勤于耕織男子帽而

長衫婦人笄而短袪喪葬飯蔬飲水二十一日封而識之若馬鬣者卽今宋宣慰之祖也□蔡家在底寨者與宋家同俗故世世連婚在養龍坑者無異苗人男女吹木葉而索偶人死不哭繞屍而歌謂之唱齋□仲家椎鬣躡屨不通文字好為樓居飲食匙而不筴衣裳尚青婦人以青帛蒙髮狀若冒絮長裙細績多者二十餘幅拖腰以彩布一方若綬仍以青衣襲之喪食尚魚蝦而禁禽獸之肉葬以傘蓋墓期年焚之祭以枯魚而以十一月為歲首俗尚銅鼓中空無底或掘地得者皆誇言諸

葛武侯所藏富家爭購卽百牛不堪卜用茅或銅
錢難骨然姦而無義多為寇盜云□龍家蓋徙隴
氏之裔訛為今名其種有四好依深林薦莽之間
狙伺圍奪急則鼠竄貪而善讐常以盃羹為人奔
命男子束髮不冠婦人斑衣以五色藥珠為飾貧
者代以薏苡春時立木于野謂之鬼竿男女旋躍
而擇對旣奔則女氏之黨以牛馬贖之方通媒妁
人死以杵擊臼和歌而哭舁之幽巖秘而不識以
七月七日祭其先塋○四龍家與仲家同俗而衣
尚白喪服則易青婦人縵布作冠若馬鐙在寧谷

西堡頂營之間者多張劉趙三姓一曰大頭龍家
男子以牛馬鬃尾雜髮而盤之若蓋以尖笠覆之
一曰狗耳龍家婦人辮髮螺結上指若狗耳之狀
亦曰小頭龍家一曰曾竹龍家俗與龍家同○狃
狃一曰狃獠其種有五蓬頭赤脚矯而善奔輕命
死黨得人片肉卮酒卽為捐軀以赴湯火用布一
幅橫圍腰間傍無襪襪謂之桶裙男女同制花布
者為花狃狃紅布者為紅狃狃各有族類不通婚
姻死者有棺而不葬置之巖穴高者絕地千尺或
臨大河不施蔽蓋以木主若圭羅樹其側號曰家

親殿在平伐者為打牙狔狔剝悍尤甚父母死其
子婦各折其二齒投之棺中以永訣在新添者為
剪頭狔狔男女蓄鬣寸許死則焚之又有猪屎狔
狔者喜不潔與犬豕同牢身面經年不醜得獸即
咋食如狼□苗者古三苗之裔自長沙沅辰盡夜
郎之境皆有之與民夷混雜通曰南蠻散處山谷
間聚而成村者曰寨有名無姓有族屬無君長近
省界者為熟苗輸租服役有司籍其戶口不與籍
者謂之生苗生苗多而熟苗少其俗喜則人怒則
獸睚眦之隙遂至殺人其人雖結跣躡陟巖穴躡

荆棘捷如縻，縻斑衣左袵。或無衿，衿竅以納首。別作兩袂，急則去之。插雞尾于巔，負蘭抱弩。遇使輒鹵掠，未娶者以銀環飾耳。號曰馬郎婚。則脫之。婦人雜海肥銅鈴藥珠結纓絡為飾。處子行歌于野，以誘馬郎。狎淫不禁。仲春刻木為馬，祭以牛酒。未婚男女吹蘆笙和歌，謂之跳月中。意者男負女去，論妍媸為聘資。多寡歲首以冬三月各尚其一。曰開年在宣慰司者有東苗西苗。男髻髻着短衣，色尚淺藍。首以織花布條束髮。婦人着花裳，無袖。惟遮覆前後裙亦淺藍色。僅蔽其膝。在白納為賣爺。

苗其俗賤老而貴少父老則揆而鬻之東苗戇而
屬男子科頭赤脚婦人盤髻長簪西苗男子椎髻
上插白雞毛女子以蠟畫布衣

新貴縣

附郭

本貴竹長官司 明萬曆十九年并龍里衛平伐
長官司地共置今縣以貴竹司為貴竹鄉平伐司
為平伐鄉知縣設流官丞簿各一員仍用土官

世襲

貴定縣

附郭

萬曆三十六年從守臣請割貴陽縣及定番州之
地設立今縣請額于朝而兩用之按是時葉福唐

當國謂其原籍福建福州府福清縣三福相連暨
輿圖中未有偶者因請額疏至票擬為貴州貴陽
府貴定縣以配之遂蒙 欽定如擬行焉

宣慰使司附郭

蜀漢建興三年諸葛武侯南征時牂柯帥濟火漬
糧通道以迎武侯表封為羅甸國王其部落有七
曰盧鹿蠻者即今羅羅俗尚鬼號正祭者為鬼主
今猶謂之羅鬼居普里即今普定衛是唐開成初
年鬼主阿風內屬會昌中封為羅甸王自濟火傳
至普貴凡五十六代為宋開寶間納土歸附仍襲

王爵州之名貴或以地產貴竹或亦以普貴云是
時有宋景陽者真定人奉詔平定諸蠻有功因析
置大萬谷落總管府以景陽為總管嘉定間移府
于今司治元初為羅施鬼國尋改羅甸軍民安撫
司至元十六年更為順元軍民安撫司二十四年
增置順元路并貴州于司治以統降附我朝洪
武初悉罷元所置而獨置貴州宣撫司六年陞宣
慰使司今與貴陽府貴前二衛同在省城府衛所
轄地在城北宣慰司所轄地在城南○按普貴之
後至元末有霽翠宋氏之後有宋欽俱以洪武四

年與土人安沙溪等歸附

高皇帝乃以霽翠為宣慰使欽與沙溪皆同知得各統所部而霽翠強盛霽翠死其弟安的襲職故世為安氏焉安氏領羅夷民四十八部其部長曰頭目宋氏領漢夷民十二部其部長曰馬頭又同知安氏領夷羅民一部其部長亦曰頭目而九長官司則宣慰司總領時有奢香者霽翠之妻也翠死貴州都督馬燁以小罪械致香裸撻之諸羅怒欲反時宋欽亦死妻劉代立劉謂奢香部羅曰無詳吾為汝訴天子天子不聽反未晚也遂蹶馳見

太祖白其事。太祖使劉折簡召奢香香即與其子婦亦騏馳至自陳守土功及馬燁罪狀。太祖召燁斬之因封奢香順德夫人劉氏明德夫人奢香歸乃開貴州東北赤水烏撒道以通蜀烏蒙立龍場九驛世辦馬匹廩餼以報德劉氏傳至曾孫昂玄孫炫皆博學能詩文詳見後

貴州衛

附郭

洪武四年建領左右中前後五所

貴州前衛

附郭

洪武二十八年建領左右中前後五所

志云藏甲山在省城前衛治西南隅俗名鬼王洞
漢有王志者英武過人而貌寢軍中呼為鬼頭官
至校尉從諸葛武侯南征禽雍闓過此藏盔甲以
鎮蠻相傳有人入洞盔甲猶在巖壁欲取之輒有
蝙蝠如鴉撲滅其火巖中啾啾有聲○東山在省
城東門外二里峭壁千仞越二里有銅鼓山亦高
百餘仞山半空洞常有銅鼓之聲又五里有棲霞
山腹有來仙洞明吳國倫東山詩九日不登高烟
霞澹林麓十日秋氣清東山倚天矗複道舒新綦
琳宮隱扶木振衣躡其巔一縱千里目荒城大如

斗衆山渺焉伏掃石坐層雲鳴鐘發幽谷僧至焚
妙香居然在天竺忽開西域蓮掩彼南陽菊何言
非吾土良遊此堪卜

王守仁棲霞山詩

古洞生寒

客到稀綠陰荒徑草萋萋書懸絕壁留僧偈花發
層蘿繡佛衣提榼遠從童冠集杖藜真覺鶴猿知
石門遙鎖陽明洞應笑山人久未歸○獅子山在
城南一里然城之東西里許皆有山如獅子狀又
城周圍有五虎山又南五里有鳳凰山相傳五虎
三獅一鳳凰者是也又南二里有高連山以其勢
高而連絡天馬貴人諸山故名唐史謂牂牁境內

有高連石門二山即此又五十里有青巖巖下南
明河遠之至省河中有洲曰芳杜可資遊憩○城
北二里有貴山蜀道所經一名貴人峯城東北一
里有點易巖黔記云郡人易貴校易于此按易貴
宣慰司籍居江西吉水縣景泰甲戌進士歷官辰
州府知府所著有竹泉文集十五卷詩經直指十
五卷○三仙洞在宣慰司東四十里中有三石座
傍有石盆仰盛巖溜踰二十里有石門山山石對
峙如門故名○朝陽洞在司之西廢谷龍長官司
側其中可容數百人懸巖滴乳千態萬狀間有青

綠綴于石上踰二百五十里有瑪瑙山峯巒逶迤
宣慰安氏宅其山麓○白龍洞在司西北十五里
深入數十丈遊者秉炬導之半里許有水泠泠編
竹橋以度再入有鐘乳數株大如楹扣之戛然如
鐘○龍岡在司北五十五里龍場驛有東洞王守
仁關之改名陽明洞天守仁餘姚人正德初以忤
劉瑾謫龍場驛丞初至無室居龍岡叢棘間遷于
東峯石穴即陽明洞也龍場民憫其陰濕相與伐
木作室于叢棘之方名曰何陋軒後以禽宸濠功
封新建伯卒謚文成守仁龍岡新構詩謫居聊假

息荒穢亦須治鑿巖蘿林條小構自成趣開窗入
遠峯架扉出深樹墟塞俯逶迤竹木互蒙翳畦蔬
稍漑鋤花藥頗雜詩宴適豈專予來者得同憩輪
奐匪致美毋令易傾敝陽明洞詩古洞闕荒僻虛
設疑相待披萊歷風磴移居快幽境營炊就巖竇
放榻依石壘穹室旋薰塞夷坎仍掃灑卷帙漫堆
列壺樽動光彩夷居信何陋恬淡意方在豈不桑
梓懷素位聊無悔○陸廣驛在陸廣河側通水西
之要路又有烏江湍流奔放水色深黑與播州相
界處

定番州在十府南

成化十年長官方勇等願開府治設文臣領之遂
設程番府于程番長官司而司隸焉隆慶二年移
府治省城萬曆十四年設定番州于舊府治仍隸
以司○牂牁江在州城南源出州西北三十里亂
山中南流入廣西泗城州為右江至潯州與左江
合下番禺入南海謝三秀渡牂牁江詩江路分明
舜水灣汀花汀草破愁顏朝憑短棹乘風去暮逐
孤篷載月還逸興尚餘尊酒在浮名不及釣絲閒
胡牀箕踞逢多暇看遍城南十里山

金筑安撫司在二府西南一

唐為牂牁國羈縻州地宋為南寧州地元至元十
九年置金筑司領十七長官司一縣 本朝洪武
四年酋長密定歸順置金筑長官司于斗笠寨隸
貴州衛十年陞安撫司十六年密定遷司治于杏
林峯永樂十一年密定子得珠于馬嶺之陽即壩
寨也正統元年改隸貴州布政司成化十一年隸
府○螺擁山在司城東二十里高五里其形如螺
上有深淵水碧如藍四時不涸每天欲曙鳥獸咸

集而飲之傍有螺湧寺一名羅永菴初 建文君

自遜國後一日至此題詩于壁吾學編及雌伏亭
叢記俱載之至萬曆間定番州知州王應昌訪其
事在羅榮寨五里許有白雲菴乃建文題詩處
豈誤榮為永誤寨為菴耶菴畔一井周匝可二尺
許深半之相傳為建文所濬井中水恒雨不溢
恒旱不涸時有雙鯉出沒其間久旱出輒雨久雨
出輒晴其應不爽菴後有白雲洞外窄中夷可坐
可卧有隙通天光明內朗菴左右杉木數章大者
數圍小者合抱亦傳皆建文手植

宣慰司所屬

青山長官司元置青山等處蠻夷軍民長官司
我洪武五年改今司正長官蔡劄土人 國初歸
附調征有功授長官傳至堂世襲副長官劉士真
土人洪武三十六年調征有功陞今職世襲右在
宣慰司西北三十二里

龍里長官司元為龍里縣洪武五年置今司正長
官何有善土人世襲右在宣慰司東五十里

水東長官司在宣慰司北三里元舊司仍以狍狍
蠻夷長官益之正長官向四副長官胡文英俱世

襲○又七十里為劄佐長官司正長官宋文忠土

人洪武五年授今職世襲○又二十五里為底寨
長官司正長官蔡永昌土人洪武四年任今職世
襲副長官梅忠鳳陽府人洪武八年征雲南有功
授今職世襲

養龍坑長官司在宣慰司北二百二十里土人蔡
普化洪武五年任今職世襲副長官土人謝文直
充把事永樂五年授今職世襲宋濂龍馬贊序畧
云西南夷出良馬而產于羅鬼國者尤良其地有
養龍坑在兩山之中泓渟淵深蛟龍實藏其下當
春始和夷人立柳坑畔擇牝馬之貞者繫之已而

雲霧晦冥類有物蜿蜒跨馬腹上迨開霽視馬傍
之沙有龍跡者是與龍遇矣至產必為龍駒洪武
四年夏國主明昇獻良馬十其一色正白乃得之
于此者身長十一尺首高九尺足之高比首殺其
二尺有肉隱起項下約厚五分廣三寸餘貫纓絡
腹至尾閭而止振鬣一鳴萬馬辟易上乘之行夕
月之禮于清涼山正如躡雲而馳一塵不驚賜名
飛越峯命繪形藏焉

中曹蠻夷長官司元為白納縣阿聳寨地洪武五
年改置正長官土人謝石寶副長官土人劉禮賓

俱世襲右在宣慰司南三十里○又四十里為白
納長官司元白納縣後改中曹白納長官司旋益
以茶山之地改茶山白納等處蠻夷軍民長官司
洪武初歸附中曹已置司而白納之地失報宣慰
司以頭目周可敬領其地永樂四年置今司遂以
可敬為正長官土人趙仲祖為副長官俱世襲
乖西蠻夷長官司在司東一百五十里正長官土
人楊文真副長官土人劉海俱世襲

定番州所屬

程番長官司附州元為武勝軍安撫司洪武五年

貴州通志 卷之二
改置正長官程谷祥舊為安撫洪武初改授今職
世襲

小程長官司在州西北五里長官程受孫世襲

盧番長官司在州北五里元置盧番靖海軍安撫
司析其西地置盧番蠻夷軍民長官司洪武五年
合置今司以元安撫盧朝俸為正長官世襲

上馬橋長官司在州西北二十里元為上橋縣洪
武五年改置今司以方朝俸為正長官世襲

韋番長官司在州南五里洪武五年以元安撫韋

四海為正長官世襲○又三里為方番長官司正

長官方得用世襲亦元舊安撫也
卧龍番長官司在州南十五里宋置南寧州酋長
龍漢瓊稱雄長因號龍番元豐初入貢元改卧龍
番南寧州安撫司洪武五年改置今司以元安撫
龍得壽為正長官世襲

小龍番長官司在州東南二十里元為靜蠻軍安
撫司洪武五年以元安撫龍租為正長官世襲
金石番長官司在州東二十五里宋為石番元為
金石番太平軍安撫司洪武五年改置今司以元
安撫石愛為正長官世襲

貴州通志 卷之二
大龍番長官司在州東南五十里元為應天府安
撫司洪武五年改置今司

羅番長官司在州南三十里元為邊蠻軍安撫司
洪武五年改置今司以元安撫龍勢瑛為正長官
世襲

廬山長官司在州南一百里元為廬山等處蠻夷
軍民安撫司洪武五年改置今司以元土官盧經
保為正長官世襲

木瓜長官司在州東一百里元初為羅賴州尋改
木瓜等處蠻夷軍民長官司洪武五年改置今司

以元長官石蓋為正長官世襲是時南直隸人顧
宸以征南有功授副長官世襲

麻嚮長官司在州南二百里洪武五年以得雍為
正長官世襲

大華長官司在州南二百二十里洪武十年置

威清衛

唐宋為羅甸國地元為八番羅甸宣慰司地洪武
初屬貴州宣慰司二十一年置威清站隸貴州衛
二十三年始置今衛隸都指揮使司在省城西四
十五里山路稍夷木多野橙指揮劉世爵祖宅有

玩畧堂相傳。建文君避跡過此為之書扁。○華
蓋洞舊名涼傘洞。副使焦希程改名雲龍。御史李
本固復易今名。希程記畧云：去衛城西二里許有
洞，洞門卑隘，磬折而入，中可容數十人。其上則氤
氳之氣蒸而成溜，蒼然蔚然，崖石變幻，望之如雲
狀，態互異，或如靈芝，如蓓蕾，如璣衡，如凝露，如蜂
房，如蛛網，篆烟盤旋於密石，如齊紈，越縠飄緲，從
輕風銳如懸錐，莖如覆肝，如神龍自天而下，凜乎
雷電之將至。○城西南一里有扁洞，洞口扁窄，內
漸寬，廣深入，則有小溪潺湲，溪傍石乳盤屈如龍。

蛇上有一竅通明○城南一里有曹本洞明啟如
堂越二十里有銅鼓山山半有洞每陰雨則其中
鏘然有聲○城西八里有的澄河源出普定九溪
壩流經衛城入洞伏流十里至青山復出明楊慎
詩山圍羅甸國水繞的澄橋橋下東流水可惜無
蘭橈

平壩街

漢唐宋俱為羅甸國地元為金筑府地洪武二十
三年始置今衛屬貴州都司在省城西九十里學
士夏言平壩道中詩落日荒村生紫烟攢峯疊嶂

畫屏連行雲帶雨穿松塢野水流香出稻田蟲響
空山秋榻靜月斜孤壁夜堂偏不眠起坐千憂集
城角無端到枕邊○南仙洞在衛東南十五里石
壁高十丈入洞二十餘武地勢寬平可容千人折
而西有深潭隱隱若神氣逼人不可正視歷磴而
上石窗開明垂照如室○衛城東十五里有洛陽
洞在洛陽河側四時有魚躍漁者張網其上因而
有稅其後稅免亦不得魚○聖泉在衛城西五里
而近里人劉汝楫記畧云自西郭沿溪流躡石磴
可五里許當礪河疊嶂中一泓自石罅迸水匯為

方池每日潮汐無停好事者置石鼓其內潮溢尺
餘下至鼓之半而止通晝夜計之凡百次按弇洲
錄名百刻泉一統志名靈泉即此楊用修詩瞻茲
鑿沸流聲彼渾沌年盈涸在頃刻消息同坤乾塵
刹變潮汐億垓無質遷岷觴衍游聖坳舟喻思玄
迷踪鬼方霧蘊真羅甸烟詎逢陸羽品那遇桑欽
傳○嘉客泉舊名珍珠泉鼓吹喧闐則水珠大湧
副使焦希程記畧云平壩西南十里有泉湧焉淮
而成池溢則成溪湛然甘冽可鑑可酌冬溫而夏
清客至語笑明珠翠玉纍纍而沸風恬日霽晶瑩

射目客語在左則左應在右則右應眾寡亦如之
否則已殆如酬酢因名之曰嘉客泉

安順軍民府

一在省城西北

與普定衛同城

國初設安順州萬曆三十年改今府治普定衛城
舊志云部多羅鬼會飲不用盃酌置糟于瓮以藤
吸之男以氊為禮人死火葬○舊坡山在府城西
北兩峰相對中有石關又五里為新坡山○府城
西南三里有紅土坡土色如硃又十里有黑土坡
土色如墨○廣輿記云普定有天生橋石壁千仞
環繞如城水經其下驚濤急流乃天設之險也右

去府城東北五里搏翠峯之麓有龍潭洞出洞十
餘丈即橋明王守仁天生橋詩水花如練落長松
雲際天橋隱白虹遼鶴不來華表爛仙人一去石
樓空徒聞鶻鴛橫秋夕漫說秦鞭到海東移放長
江還濟險可憐虛却萬山中

所屬土司

寧谷長官司在府西南二十五里元為寨洪武十
九年置今司領二十九寨以本司人顧興仁為副
長官正統元年三世孫雄有功陞正長官○司之
東南有乾海海水泛時與雲南旱海彼此相反或

其地脉更迭為盈縮云

西堡長官司在府西北九十里元為寨洪武十九年置今司領四寨二十五年以下却為正長官其司之後有浪伏山元置習安州于山下越五十里有白石巖巖高頂夷有泉四時不竭一徑攀援而上○司東南五十里楚由洞山高數仞洞在山畔深廣百里又十里有播老鴉洞洞深不可測而山勢益險峻

普定衛

晉為興古郡地唐為羅甸國地羅鬼於稅可磨苗

所居號普里部元初內附置普定縣尋改普定府
隸雲南行省 國初洪武十四年復置普定府屬
四川布政司築城于今城東二十里尋增置普定
衛徙今城十八年府廢衛存楊慎滇程云自平壩
六亭至普定衛實荒徼名都永寧安順鎮寧三州
同城地稍坦夷山如髻鬟用修詩云鬼方昔云遐
羅甸今初入陰霾暄凝交瘴氣昏曉集長亭比縣
遙咫尺如棘澁石行蹶昆蹄沙炊烟蒸粒斷腸盤
江河銷魂龍從坡軍堡鳴笳近蠻營荷戟多三辰
晦光彩七旬歷滂沱鬪衣從風亂蘆笙跳月歌可

憐異方樂令人玄鬢皓○歡喜嶺在衛城北二里
洪武中蠻賊攻城指揮顧成追殺大勝于此故名
成後鎮貴州征五開六洞破一百三十七寨以左
都督封鎮遠侯卒年八十五贈夏國公謚武毅墓
在城東四十里

鎮寧州 與安莊衛同城

漢唐宋為牂牁郡羅甸國地號普東部元于羅黎
寨置和私州尋改鎮寧州隸雲南普定路 國朝
正統三年改屬貴州布政司嘉靖十二年遷州治
于安莊衛城其俗不分貧富以牛多為大姓婚亦

論牛○火烘坡在州治北古名和弘山州舊治此山石高其氣燥燠雖隆冬登陟汗出浹背○州治東有既濟泉其地極熱此水獨涼

州屬土司

十二營長官司在州北三十里元為十二營寨洪武十九年置今司領二十九寨正長官隴阿住舊為本司營長洪武十九年以功授今職安撫蕭傑湖廣雲夢縣人洪武七年功授試副長官俱世襲○司西五十里有阿破河土人以索為橋而渡名索度橋

康佐長官司在州東四十里元為康佐寨洪武十
九年改司正長官薛福壽江西贛縣人以功授今
職安撫于成山東寧海州人初授試副長官三世
孫鎰功陞今職俱世襲

安莊衛

洪武十四年以永寧鎮寧二州地置納吉堡二十
二年改置安莊衛隸貴州都司○環翠山在衛治
北白水河在衛治南有白虹橋跨之懸崖飛瀑過
者不寒而慄○慈母山在衛城西三里俗名背兒
崖形如母負子然又三里有雙明洞舊名紫雲洞

督學徐樾更今名樾記畧云將入洞之徑兩山夾道下有寒泉注為澄潭白石壁立半折崖側下有通徑劈竇圓如滿月緣門以入小徑夾崖前峯屹崿蒼碧潭流穿石折而西廻又一方渚磷磷有聲東西風日相射南北繚繞石盤如蓋崖間石筍數尺形類佛座虛可容背其傍婉曲侍童環立者數人前溪橫小梁渡此穿石洞援步而登六七步間恍然光明堂壁四周洞開一面以吐日月上圓下方奇偉一室環壁靈異莫窮變態○白崖山距衛城十里山左有清泉中產異鱉或赤或紫清泉之

貴州名勝志 明 曹學佺撰

下流合碧溪入白水河滇程記云白水驛達渣城
有難首關嶺白石堡安龍菁凡六亭諺云渣城白
水半人半鬼是滇路險絕首程也有懸崖疊水飛
流瀑布自山端下注三崿相承其下為深潭神蛇
宅之見者必嬰重疾發漲噴沫如雲霧籠冒數里
○關索嶺在衛南五十里滇程記云難公背與關
嶺相對兩山之趾界以溪澗嶺凡四十三盤至巔
有香樹坡小菁口坡白口東坡安龍菁坡胡椒凹
象鼻嶺左右皆崖菁萬仞中僅有道如梁行者慄
且汗郡人推官胡寶關索廟記畧云按將軍舊傳

貴州通志 卷之四 地理

漢前將軍羽之子建興初隸丞相亮南征戡畧諸
要害恩信孚于茲土世祀之 國初都督馬公躋
是嶺始建祠洪武二十一年置關索雞背二堡尋
併雞背入關索二十五年置守禦千戶所屬安莊
衛楊慎關嶺曲四首倦枕愁雞鳴問郎今日程中
路不可宿長途須早行又北登雞公背南望象鼻
屹相逢試相問來往定誰難又關索嶺四十三盤
高前有安龍菁行人莫辭勞又老鴉關仰樹間靈
卜西去何當還

永寧州 與安南衛同城

貴州志卷之四 地理志

唐為烏蠻僊人狍狍所居元置永寧州初屬貴州
指揮使司正統二年始直隸布政司○黔記云州
治初建于打罕寨宣德間改建于關嶺所萬曆四
年改建于安南衛○紅崖山在州西北八十里壁
立萬仞山畔有洞深廣數十丈居民間聞洞中有
銅鼓聲或崖上紅花如火故名世傳諸葛武侯駐
兵之所夷人每祭祀牲用烏牛白馬則歲稔○盤
江在州東四十里源出烏撒經曲靖西由七星關
下入安南境北轉而東南至慕役司烏泥江通廣
西入南海三國志諸葛亮南征至盤山即此夏秋

暴雨水氣紅綠色為瘴過渡處兩山陡夾水勢洶湧行人憚之楊慎盤江行可憐盤江河年年瘴癘多青草二三月綠烟生碧波又保甸坡前不可留盤江渡頭惟一舟驅鼉役鵲無靈術誰是尋源博望侯

州屬土司

頂營長官司元為寨洪武四年置司本寨民阿光歸附充寨長有功三十年陞正長官又湖廣麻城人程士貴亦以四年歸充明氏千戶有功十九年陞本司副長官俱世襲○司東三十里有雞公背

北三十里有關索嶺謝肇淛頂站詩云頂站高于
關嶺高羊腸一線入蓬蒿平臨鬼國千峯上俯首
盤江萬里濤

募役長官司元為寨洪武四年置今司是時本寨
民阿夷以歸附充寨長十九年陞正長官又六合
縣人杜仲仁歸附從軍十八年陞副長官俱世襲
○司之西北四十里有象鼻嶺正北五十里有安
籠著俱險阻難行入滇路經其上○司西北三十
里有白水河驛道之側水自高崖下注數十丈飛
沫如雨蓋黔中瀑布之最奇者吳國倫象鼻嶺詩

山形如象鼻，磧道擬螭叢。筏渡千崖底，車旋萬石中。短亭微上月，鳴瀑直生風。白髮悲行險，乾坤一轉蓬。

安南衛

洪武十七年置尾灑驛站于普安路二十三年置今衛隸貴州都司設衛治于江西坡二十五年遷于尾灑堡尾灑者夷言也華言為水下楊慎云其南閩有尾灑井清甘可茗故名○獨秀山在衛城東一里又十三里有清源洞當官道傍洞出清泉崖石奇怪楊彝詩石乳淵澄澗齒香洞門深護翠

琳瑯雲浮寒壁晴猶雨露滿空青冷欲霜蟾吐夜
光窺玉鑑鶴鳴清籟奏金商試茶取水陰崖底坐
愛將軍大樹涼○朝陽洞在衛城南一里中出異
石有泉從石隙中出澄澈如練石壁上刻有無名
氏詩云崖前花發春正濃柳如黃金來煖風柔絲
攔路挽不斷怕有俗子相交通當年老叟圍碁處
猶有窮猿掛高樹花謝花開春又春幾載避秦不
歸去紫芝瑤草變蒼苔碧桃紅樹成蒿萊市朝遷
轉居人易興亡兩事俱哀哉我向洞中詢陳跡神
仙遺石瑩如壁持得歸來售市人售遍市人俱不

識

晉安州 與晉安衛同城衛沿革詳州下

古夜郎疆域秦漢黔中牂牁二郡地至蜀漢始自
為郡建興三年諸葛亮南征分建寧牂牁為興古
郡者也唐武德二年改為西平州貞觀元年改名
盤州以州東北有盤江又有盤江山故名是時隸
戎州都督府蒙氏為南詔東鄙東蠻烏蠻居之號
于矢部蠻人性獷戾出入帶刀弩男子草蓑衣婦
女被花短裙以漁獵為生蠻人服飾嗜好與宣慰
司羅羅同其後爨酋阿宋更號齊彌部尋復為于

矢元延祐四年內附置于矢部萬戶府尋為普山
府至元間改置普安路領和龍八納習舊普安四
部隸雲南省洪武十四年克復十六年初置普安
軍民府以土酋那邦妻適恭為知府佐以流官適
恭卒子普旦代之普旦叛命襲陷普安府天兵討
平之始罷府置普安衛軍民指揮使司領其地永
樂元年置普安安撫司以土酋慈長為安撫隸普
安衛十三年慈長謀不軌始改今州設流官隸貴
州布政司州治初在撒麻繼遷海子又再遷于衛
郭萬曆十三年遷入衛城○八部山在州東三十

里九峯摩霄一泉奔注舊普安在其下○州東北
七十里有八納山高二十里其頂夷廣人跡罕到
相傳以爲首蓋智藏其祖宗魂筒于崖穴間子孫
十年一登山祭之椎牛羊持刀弩鼓噪以往又八
十里有尾灑山安南衛在其陽迥出衆山又二十
里有盤江山安南安莊之界也沈勗詩峻嶺岩堯
路向滇行人如蟻競攀緣何當絕頂凌風起少待
吹噓便上天○碧雲洞在州南三里舊名水洞外
狹內寬崖懸怪石不可名狀吏部主事楊彝歌老
夫平生愛山水每聞勝景心獨喜故人邀我城南

遊出郭溪行二三里峯環路轉非塵寰雞犬人家
足生理恍然置我桃源中風景依稀乃相似耕田
鑿井不記年疑是秦人始居此谷中樹暗連桑麻
澗底花香雜蘭芷陰陽古洞蒼山根絕壁飛崖半
空倚豁然深入天窗明外狹中間如屋裏醉眠雲
磴高似牀袖拂平沙淨于几松風一派疑天來散
作泉流和宮徵泉來直與海眼通鶴髮仙人烹石
髓蛟龍窟宅變斯須白日陰崖電光紫一聲長嘯
洞雲寒日出林梢鶴飛起○黨壁山在州西南一
百七十里四山環繞東南一箬外狹中曠可容數

百家近城有狗場坡民無編戶土酋號十二營長其部落有羅羅仲家狃狃彝人言語各不相諳以彝人譯之夷俗有火炬二節丑未月二十四日是辰此節擊鮮以祭小兒各持火喧戲于市○盤江在州東二百里源自普暢塞經此東北流合為泥江

貴州名勝志卷之一終

三
三
一

貴州名勝志卷之二

閩中曹學佺能始著

畢節道所屬

畢節衛

洪武十五年傅友德平烏撒諸蠻置烏蒙衛于烏蒙府境內十六年班師至此以其地寬廣四控皆夷路當衝要又因畢節驛名奏改烏蒙衛為畢節衛○木稀山在衛城東其頂有木稀關其下為響水河響水者懸崖飛瀑數十仞有聲如雷故名○翠屏山在衛城西蒼翠壁立望之如屏又遠之為

七星山山下有七星河兩崖相拒初鑄鐵繩繫渡
後更以浮船嘉靖間乃造七星橋山上有七星關
楊慎七星橋記畧云關號七星孔明禡牙之地衛
名畢節關索投鉞之區雖卉服之雜居乃朝宗之
首路狂谿狼谷山狀馬鞍者彌千危磴懸崖城比
虎牢者倍蕤兩嵌夾峙而有水一溪過涉以無舟
道士黃一中高誼動萬山之淵勝緣集三省之錐
出鬚蒼而壯結構剗暫蛭以施輿杠麗天半空去
地千尺星梁斗柱稽銀漢以橫陳雪浪雲濤拖玉
虹而曲抱用修七星關漁者詩石碕無通水漁舟

返上山得魚隨馬賣抱懶趁鴉還問爾江湖興茫
茫若夢間七星橋詩架壑盤崖嵌碧空驅山鞭石

讓玄功星梁天柱撐銀漢雪浪雲濤抱月虹襟帶
平分漢蜀險品題誰占古今雄登來彷彿臨玄圃
不信飄零逐轉蓬○志稱本衛尺籍皆中州人冠
昏喪祭習于禮教不混夷俗祀漢壽亭侯甚謹春

秋俎豆其祠

烏撒衛

舊名巴凡兀姑後名巴的甸自首烏蠻居之唐烏
蠻曰烏些者居此至阿蒙始得巴甸其東西又有

芒部今之鎮雄府及阿戾部皆他酋所據宋烏些
之後曰析怒者始併其地號烏撒部元至元中內
附置軍民總管府洪武初改烏撒軍民府十五年
增置烏撒衛隸雲南永樂十二年隸貴州都司今
府隸四川衛隸貴州○形勝志云岡阜盤旋海田
平遠西南要扼之區按謂上值天井之宿故其地
多雨諺曰烏撒天常披氈三日不雨是神仙楊慎
烏撒苦雨詩搖扇纔經赤水日披氈忽逢烏撒天
眼見溼雲且未霽足躡弱泥殊不前天時人事莽
牢落鄉夢客愁空糾纏古來路難寧有此楊岐阮

籍徒潛然烏撒喜晴詩易見黃河清難逢烏撒晴
陰霾既已豁險道况初平蜀日杳千里漠雲惟十
程江花與江草異國看雲生○盤江在衛西百五
十里可渡河在衛南九十五里督學鄭旻云烏撒
普德歸驛門對可渡河堧河之南霑益境也河之
北烏撒境也驛抵衛城八十里詢之候吏云河水
在衛西百里注壑而出從此而東盤江乃此水之
注也

赤水衛

唐元和元年始于西南夷地置蘭州實漢益州郡

地元屬永寧路洪武二十二年始分永寧置今衛
西去省六百里吳國倫赤水公署詩突兀蠻山合
參差雉堞低人家懸碧石公署出丹梯夜靜水聲
亂日高雲氣迷牀頭白塵尾愁絕自提携○雪山
在衛城北二十里巉巖高峻亘數十里方冬積雪
春盡始消楊慎度雪山詩羊腸蛭雪凸鳥毳澗風
凹馬擬升馮甌人如架鹿躡山圍青草瘴地入紫
薑苗不道九夷遠長吟五嶽謠○白厓驛在衛西
四十里昔阿落密故地吳國倫阿落密詩二首鼓
子花開六月寒烏丸稻熟且加餐南人新解巴歛

曲荻管聲聲蜀道難又滇人未盡蜀人過車馬如
繩奈坎軻若以相逢非故舊三杯同買聽夷歌○
層臺驛舊為層臺衛在衛東南一百里楊慎層臺
曉發詩濯足到流水回頭相見坡知津何暇問叱
馭且經過吳國倫前題野潦奔鳴石徑斜疎林殘
日見田家編籬半護邛王竹築塢新開望帝花荒
徼萬山迷蜀道遠人重譯問京華故鄉斷絕愁如
夢何處風高急暮笳○赤水河在衛城南舊名赤
虺唐武后征雲南檄文有赤虺河即此虺與水聲
相近耳源出芒部經紅土川東流入川江每雨漲

水色深赤故名楊慎赤虺河行君不見赤虺河源
出芒部虎豹之林猿獠路層冰深雪不可通千尋
建木撐寒空明堂大廈採梁棟工師估客穿蒙籠
此水奔流似飛箭縛筏乘桴下蜀甸黯淡灑瀨險
倍過海洋流沙爭一線誰驅烏鵲役鼃鼃秋濤夏
潦息盤渦柏亭雲屏濟川手奠民枕席休干戈安
得修為夷庚道鐫刻靈陶垂不磨吳國倫詩萬里
赤虺河山深毒霧多遙疑驅象馬直欲搗岷峨筏
趁飛流下檣穿怒石過勸郎今莫渡不止為風波

唐置蘭州于夷地在今治東一百八十里宋置永
寧路元改永寧鎮軍民宣撫司洪武四年改長官
司尋復宣撫司隸四川其地在馬口漁漕溪距城
西八十里十五年遷今治為永寧衛江盈科永寧
道中詩嵐重天疑晚春深煖未回山形殊齒齒路
勢總嵬嵬蔽老拳應放瓜萌甲半開故園此時節
割蜜醜青梅○永寧河在衛城西南一名水東一
名界首由城南繞東北至納溪入四川洪武十三
年命景川侯曹震開通河道制諭云水之險惡者
莫甚于永寧其灘一百九十五處至險有名者八

十二石之大者鑿之水之陡者平之楊慎詩永寧
河水接川河今古漁商竟幾過試看江門來往岸
石頭驚眼劇蜂窠○天生池在衛城北六十里四
面山繞水積于中不做穿鑿楊慎天池夜宿詩百
重石磴陟雲岑夜市千燈映碧潯遊女踏歌梅渚
月長衫高髻似雕陰

普市所

洪武二十二年以永寧路木峯山當滇貴要衝置
普市守禦千戶所于山下直隸貴州都司舉人李
陞詩三里孤城鼓角嚴繞城青擁萬山尖鳥音晴

翠巧娛耳草色春深亂入簾

龍里衛

唐宋俱為羅甸國地元置龍里州我明洪武初
置龍里驛站西達省城六十里十九年置今衛隸
貴州都司○衛城西有長衝關宋經畧使宋勝立
營于此○留雲洞在衛城南一里洞中懸二石乳
扣之如鐘鼓左有一石臺龍雲變幻名雕雲臺又
有奇石怪壁皆天然之巧而高明洞矚踰九十里
有呼應泉百叫百應音節不爽故名○明謝肇淛
詩馬桑峯口鼓鼙聲甲卒蒐山送客行五十里中

烟斷絕暮鴉寒雀滿荒城

屬司

大平伐長官司在衛南八十里洪武十九年置先是土人宋隆豆以招服本司蠻夷及撫東苗有功至是授副長官世襲○司之西南八里有冗刀山峯巒高聳形如劍戟土人保郎者宋末聚兵于此保障村寨○司界有谷峽山危峯峭豎一徑僅通其下為甕首河水流入清水江

新添衛

宋荒服有麥新蠻者據其地嘉泰初土官宋永高

始克服以子勝守之乃改麥新為新添元置新添
葛蠻安撫司隸湖廣尋隸雲南洪武四年置新添
長官司二十三年增置千戶所明年陞為衛隸貴
州都司其路皆石齒行者範金飾馬蹄踏石鏗然
火星隨迸爾雅所謂昆蹄善升巖漢書所謂踏石
汗血是也○筆山在衛城南峯如卓筆高立雲端
故名○衛城北有楊寶山山色蒼翠如繪又東北
為蔡苗山山頂有泉懸崖飛奔名曰白虹○衛城
西南有甕城河其西即麥新溪也苗人多于跳月
吹蘆笙男女相和作樂名跳月溪○馮虛洞舊名

豬母洞其後洞曰雷鳴在衛城東二十里翰林丘
禾實記畧云洞高數十仞玲瓏層複宛然樓居洞
左有水自半山東下勢如建瓴前與洞水匯而去
為澗初至洞門稍折而西曲巷委蛇陡峻不可級
先後各一僮拊葛以手若足屬僮掖且遞登洞廣
數丈深倍之前俯臨澗其後為沈泉清可以鑑泉
後崖最窄隆稍右有門方澗如寢室余復循崖而
西有滴水處可級以達上洞登崖有罅下通者二
以足捫級得達至洞門少憩乃見懸崖繽紛如伏
龍如蹲虎如委珮如流蘇前一罅直貫山頂罅上

一石離立如人崖漿滴其首蓋卽數千百年漿所
化也洞上睨下洞若百尺樓頰澗水又似在重簷
下余弟逕涉泉而入石門旣返謂余曰門內方丈
餘更有重門其中若明若暗若泉若洲且重門上
纍纍若有所屬殆龍蛇之類又前視泉中一物長
尺有咫鱗甲皆具余恐真龍也挽之而出復從左
山索之更得一洞深入無內履其傍聞聲如吼稍
入如雷深入乃知為澎湃聲有坎巉巖下臨無際
則渟泓一潭也因名之曰雷鳴仍援石下視建瓴
處實當小洞下有尾閭為潭所洩水三疊如珠簾

北洞去馮虛洞百餘步地仍處高然水不下洩而
旁穿為瀑布云

屬司

新添長官司附郭沿革詳見衛下 國初宋永高
裔孫名亦鱗者歸附至其孫仁貴授承直郎本司
正長官世襲

小平伐長官司在衛西五十里元為雍真等處蠻
夷長官司以宋清貴為正長官洪武十五年改今
司授清貴裔孫斌保為承直郎正長官世襲
丹平長官司在衛西南三百里元莫要武為都總

管傳四世孫谷送洪武十七年隨征有功授正長官世襲

丹行長官司在衛西南三百里元有羅光蓋任安撫洪武三十年以光蓋曾孫海為正長官世襲把平寨長官司在衛南六十里元有蕭貞者任安撫洪武五年以其子任成為正長官世襲

貴州名勝志卷之二終

